

AMETS ZURUTUZA ESKISABEL

A Maila | Olerkia | aipamen saria

Ni Amets Zurutuza naiz, 16 urteko Beasaindarra. Lazkaoko San Benito ikastolan ikasten dut, Batxilergoko lehen mailan. Nire zaletasunen artean bidaiatzea eta literatura aurkitzen dira.

EUSKARA

Gizakien lehen ahoek

erditu zintuzten,

baso berdeen hats umelak

eman zizun ongietorria.

Oinutsik ibili izan zara

haitz mendietan.

Kalatxoriak lagun izan dituzu

portuko kresalaren baladetan.

Urteetan zehar ibiliz

denboraren bidean,

pauso arinez.

Mendeetan zehar

arnastutako denborak,

kimutik adar

eta adarretik zuhaitz

bilakatu zaitu.

Sustraietatik abiatutako

hizkuntza zakarra,

adar puntako lorea bezala

loratu den izana.

Ez da beti erraza izan

bidean aurrera jarraitzea.

Ahotsa ito dizute

behin, eta berriz,

etengabe.

Izuaren eta etsipenaren

atzean izkutatzer behartua,

itzalen artean bizirauten.

Lasai, badoa etsaia,

aske bidean zara

zabaltzeko.

Joan dena

joana,

eta hemen dena

hemen da.

Baina hemen dena

sortzeko geratzen da.

Mila gauza zara,

dena batean finkatuta:

hizkuntza, kultura

izana...

Baina zer zara,

ez bazara Euskara?